

Evening Dogri (NSD) Bulletin 25-03-2024

आकाशवाणी

खास खबरां

- 1 भारत नै आतंकवाद गी मदाद करने ताई पाकिस्तान दी नुक्ताचीनी कीती ऐ ते आक्खेआ ऐ जे इस्लामाबाद गी आतंकी कारखाने बंद करने दी सलाह दित्ती जानी लोड़चदी, जिनें बन्ने पारां थमां जम्मू कश्मीर च आतंकवादी हमले जारी रक्खे दे न।
- 2 चुना कमीशन नै आँदे लोकसभा चुनाएं दरान सियासी पार्टिएं ते होरने सब्बने मुत्तलका धड़ें गी कागज दा घट्टोघट्ट इस्तेमाल करने लेई आक्खेआ ऐ।
- 3 विदेश मंत्री डॉ. एस.जयशंकर होरें अज्ज सिंगापुर दे प्रधानमंत्री ली हसेन लूंग हुंदे कन्नै मलाटी कीती।
- 4 अज्ज मुख्य भरै च रंगे दा ध्यार होली मनाया जा'रदा ऐ।
- 5 मौसम सरबंधी भारतीय मैह्कमे नै कल्लै तोड़ी अरुणाचल प्रदेश, असम, मेघालय, सिक्किम ते पच्छिम बंगाल दे पहाड़ी इलाकें च गरज कन्नै बरखा होने दी पेशगोई कीती ऐ।

<><><><><><>

India-Pak

भारत नै आतंकवाद गी मदाद करने ताई पाकिस्तान दी नुक्ताचीनी कीती ऐ ते आक्खेआ ऐ जे इस्लामाबाद गी आतंकी कारखाने बंद करने दी सलाह दित्ती जानी लोड़चदी, जिनें बन्ने पारां थमां जम्मू कश्मीर च आतंकवादी हमले जारी रक्खे दे न। नमीं दिल्ली नै आक्खेआ ऐ जे आतंकवादिएं गी पनाह् समर्थन ते मदाद देना पाकिस्तान दा इतिहास रेआ ऐ। कल जनेवा च अंतरा-संसदी संघ दे इक सौ 48में इजलास च बोलदे होई राज्य सभा दे डिप्टी चेयरमैन हरिवंश होरें अपने संबोधन च एह् गल्ल आक्खी। उनें आक्खेआ जे संयुक्त राष्ट्र सुरक्षा परिषद आस्सेआ परिवंधित सब्बने थमां मती संख्या च आतंकवादिएं गी आसरा देने दा रिकार्ड पाकिस्तान कश ऐ। उनें आक्खेआ जे वैश्विक आतंकवाद दा चेहरा ओसामा बिन लादेन बी पाकिस्तान थमां गै लब्बा हा। भारती इलाके बारे पाकिस्तानी दी टिप्पणी गी खारज करदे होई हरिवंश होरें आक्खेआ जे इक नेह् मुख्य आस्सेआ लोकतंत्र बारे लैक्चर देना इक मजाक गै ऐ जेह्दे अपने लोकतंत्र दा इतिहास इन्ना माड़ी ऐ। उनें आक्खेआ जे भारत दुनिया दा

सबने थमां बड्डा लोकतंत्र ऐ ते इसी इक आदर्श लोकतंत्र मन्नेआ जंदा ऐ। जम्मू कश्मीर ते लद्दाख गी भारत दे अटूट हिस्सा गलांदे होई हरिवंश होरें आक्खेआ जे दुश्प्रचार कन्नै एह असलियत बदली नेई सकदी।

<><><><><><><><>

ECI-Sustainable Polls

चुनां आयोग औंदे लोकसभ्रा ते असैंबली चुनाएं दरान पर्यावरण दे सतत संरक्षण लेई बढ़ावा देआ'रदा ऐ। आयोग नै चुनां मशीनरी ते सियासी पार्टिएं गी निर्देश जारी कीते न जे ओह वोटर-फेहरिस्तें ते मतदाता समेयान च कागज दा घट्टोघट्ट इस्तेमाल करन। आयोग नै ताकीद कीती ऐ जे ई-कताबें ते ई-दस्तावेजें दा मते शा मता इस्तेमाल कीता जा ते प्रिंट करदे'लै कागज दे दौनें भेठा प्रिंट कीता जा। निर्देशें च इब्बी आक्खेआ गेआ ऐ जे चुनां संचार दरान इलैक्ट्रानिक तरीकेकार दा बद्धोबद्ध इस्तेमाल कीता जा। आयोग नै चुनां मशीनरी ते सियासी पार्टिएं गी आक्खेआ ऐ जे ओह इक्कै बारी इस्तेमाल च औने आले प्लास्टिक दी बरतून भलेयां नेई दे बरोबर करन ते पर्यावरण अनुकूल लोकसभा ते असैंबली चुनाएं लेई बक्ख-बक्ख कूड़ेदान लान। हर किस्म दी रैंद-खैंद गी ठकाने लाने दे मुनासब प्रबंध करन। मतदान पैनल नै आक्खेआ ऐ जे औन-जान लेई पर्यावरण दोस्त गड्डिएं दा इस्तेमाल कीता जा। कारपूलिंग कीती जा ते मतदान दे दिनें सार्वजनिक गड्डिएं दा इस्तेमाल कीता जा।

<><><><><><><><>

Jai Shankar

विदेश मंत्री डॉ. एस.जयशंकर होरें अज्ज सिंगापुर दे प्रधानमंत्री ली मेसन लूंग हुंदे कन्नै मलाटी कीती। इस सोशल मीडिया पोस्ट च डॉ. जयशंकर होरें आक्खेआ जे श्री लूंग हुंदा सकारत्मक व्यवहार भारत-सिंगापुर बश्कार सरबंधें लेई म्हेशां मजबूती दा स्त्रोत रेआ ऐ। डॉ. जयशंकर होर एल्लै सिंगापुर दे त्रऊं दिनें दे दौरे पर न। एहदे शा पैहले डॉ. जयशंकर होरें सिंगापुर दे विदेश मंत्री विवियन बालाकृष्ण हुंदे कन्नै बी मलाटी कीती। बैठक दरान दौनें लीडरें भारत ते सिंगापुर बश्कार दपक्खी सरबंधै, हिंद-प्रशांत ते पच्छमी एशिया जनेह मुद्दें पर बी चर्चा कीती।

<><><><><><><><>

Holi Festival

होली दा ध्यार अज्ज पूरे मुल्खै च मनाया जा'करदा ऐ। एह ध्यार बुराई उप्पर अच्छाई दा प्रतीक ऐ ते बसंत रूत दे औने पर मनाया जंदा ऐ। इस ध्याड़े लोक इक दुए पर गुलाल लांदे न। इक दुए गी बधाइयां दिंदे न, मठाइयां बंडदे न ते बड्डे दा अशीर्वाद लेंदे न। राष्ट्रपति द्रौपदी मुर्मू, उपराष्ट्रपति जगदीप धनखड़ ते प्रधानमंत्री नरेंद्र मोदी होरें लोकें गी होली दियां मुमारखां दित्तियां न। राष्ट्रपति होरें आखेआ ऐ जे होली खुशी दा ध्यार ऐ जेड़ा लोकें दी जिंदगी च आसां—मेदां ते जोश भरदा ऐ। उपराष्ट्रपति जगदीप धनखड़ होरें आखेआ ऐ जे एह लोकें दे रिश्ते गी होर निग्गर करदा ऐ ते बसंत रूत दा सोआगत करदा ऐ। अपने स्नेह च प्रधानमंत्री होरें आखेआ जे होली दा ध्यार लोकें दे जीवन च नमी उर्जा ते जोश दा संचार करदा ऐ।

<><><><><><><>

BSF Holi

सीमा सुरक्षा बल दे जुआनें पुंछ च नियंत्रण रेखा कश रंगें दा पर्व होली मनाई। चुनौती आले हालात दे बावजूद बन्ने पर तैनात इनें जुआनें दे जज्बा दिक्खदे गै बनदा हा।

<><><><><><><>

IMD

मौसम सरबंधी मैहकमे नै अरुणाचल प्रदेश, असम, मेघालय, सिक्किम ते पच्छिम बंगाल दे पहाड़ी इलाकें च कल्लै तोड़ी बरखा होने दी पेशगोई कीती ऐ। मौसम मैहकमे नै जम्मू कश्मीर, लद्दाख, गिलगिल बलतीस्तान, हिमाचल प्रदेश ते उत्तराखंड च शुक्रवारें तोड़ी बरखा जां फही बर्फबारी होने दी संभावना दस्सी ऐ तोआई मैहकमे नै अगले दऊं—त्रऊं दिनें तोड़ी उत्तर—पच्छमी भारत च बद्धोबद्ध तापमान च 2 थमां 3 डिग्री सैल्सियस तोड़ी बाद्धे दे मेद दस्सी ऐ। राजस्थान, मध्यप्रदेश, गुजरात, महाराष्ट्र, आंध्रप्रदेश, तेलंगाना, कर्नाटक, केरल ते तमिलनाडू च बद्धोबद्ध तापमान 36 थमां 40 डिग्री सैल्सियस तोड़ी पुज्जी सकदा ऐ।

<><><><><><><>

Ujjain Fire

मध्यप्रदेश दे उज्जैन दे महाकालेश्वर मंदरै दे गर्भगृह च अज्ज बडलै अग्ग लगी गई। एह घटना भस्म आरती दरान होई। इस घटना च पुजारी सनें दर्जनां लोक घायल होने दी खबर ऐ। घायलें गी इंदौर ते उज्जैन दे अस्पतालें च भर्ती कराया गेआ ऐ। उज्जैन दे कलेक्टर नीरज सिंह होरें घटना दी जांच दे हुक्म दित्ते न। मुख्यमंत्री डॉ. मोहन यादव होरें दोषिणं खलाफ सख्त कारवाई करने दे निर्देश दित्ते न।

<><><><><><>

PM-Ujjain Fire

प्रधानमंत्री नरेन्द्र मोदी होरें उज्जैन दे महाकाल मंदरै च अग्ग लगने दी घटना पर दुख प्रगट कीता ऐ। उनें इस हादसे च घायल होए दे सब्बने श्रद्धालुएं दे तौले नरोए होने दी कामना कीती। श्री मोदी होरें आकखेआ ऐ जे राज्य सरकार दी दिक्ख-रिक्ख च स्थानीय प्रशासन पीड़ितें दी हर मुमकन मदाद करा'रदा ऐं तोआई केन्द्री गृहमंत्री अमित शाह होरें उज्जैन महाकाल मंदरै च आगजनी दी वारदात बारे मध्यप्रदेश दे मुख्यमंत्री मोहन यादव हुंदे नै गल्लबात करियै हादसे बारे पुच्छ-पड़ताल कीती। अपनी इक सोशल मीडिया पोस्ट च श्री शाह होरें आकखेआ जे स्थानीय प्रशासन प्रभावतें दे इलाज-मुआलजे दियां सब्बै सहूलतां मुहैया करोआ'रदी ऐ।

<><><><><><>

Congress List

कांग्रेस नै औंदे लोकसभा चुनाएं लेई अपने 5 होर मेदवारें दे नाएं दी सूचि जारी कीती ऐ। कांग्रेस नै कोटा थमां प्रलहाद गुंजल, अजमेर थमां रामचन्द्र चौधरी ते राजसामंद थमां सुदर्शन रावत गी टिकअ दित्ती ऐ। इनें तमिलनाडू च तिख्णलबेल थमां एडवोकेट सी.राबर्ट ब्रूस गी अपना मेदवार बनाया ऐ।

<><><><><><>

Tenis

टैनिस च भारत दे रोहन बोपन्ना ते आस्ट्रेलिया दे मैथ्यू एबडिन दी जोड़ी नै मियामी मास्टर्स एटीपी 1000 प्रतियोगिता च ईटली दे साइमोन बोलेली ते एंड्रिया वावासोरी दी जोड़ी गी हराइयै दुए गेड़ च प्रवेश कीता। हुन रोहन बोपन्ना ते मैथ्यू एबडिन दी जोड़ी दा अगला मकाबला Hogo Nys ते Jan Zielinski दी जोड़ी कन्नै होग।

<><><><><><>